

Te mahere ā-rohe o Puketāpapa 2020

He aronga poto i tā mātou mahere



Mihi

Tēnei au te noho atu nei
i te kāhiwi o Waikōwhai ki te uru.

Ka mihi iho au ki raro
ki te ākau o Manukau moana,
he taunga kawau tiketike,
te eke ki te tāhuna tōrea.

Ka huri whakateraki aku kamo,
ka kite atu au i te ara hou e kokoti mai rā
i taku manawa me te Ahikāroa o Rakataura,
kia tae au ki Te Tāpapakanga a Hape
ka hoki mai anō taku hā,
kei reira nei hoki kō Pukewīwī.

Ka kite kau atu au i te remu o Ōwairaka,
ka hoki whakararo ano ōku whakaaro
ki Te Tātua o Riu ki Uta
e tu ārai mai rā mōku i te whitinga
mai o te rā.

Kei tua ki te raki, ko te Puku o te Tipua
nei o Tāmaki Makaurau,
kei raro ko te Onehunga.

Kātahi au ka hoki mā te Kāhiwi Pūpuke
kia ū atu anō au ki a koe Waikōwhai.

I kona ka tau aku mihi,
ka eke, kua eke.

Hui e, taiki e!

Kei tēnei puka te whakarāpopotohangā o te Mahere Pōari ā-Rohe. Toro atu
ki te paetukutuku o Te Kaunihera o Tāmaki Makaurau,
www.aucklandcouncil.govt.nz mō te roanga ake o te mahere.

He kōrero nō te Heamana

I te mahere nei e whakaritea ana, i huri te ao.

Tuatahi, i āwangawanga mātou kāore pea e hāngai tonu ngā whakawhitinga kōrero o te Huitanguru me te Poutūterangi i ngā rā o te MATE-KORONA, te tū tīrara me te noho taratahi. Kāore i tino tika ngā mahere i wawatia ai nā runga i ngā taumahatanga i tau mai ki runga i te katoa.

Heoi, i a mātou e whakatōpū ana i ngā kaupapa matua o ngā whakawhitinga kōrero tuatahi, i kitea ngā kaupapa e hāngai pū ana ahakoa ngā taumahatanga o te wā, nā, e kīia ai pea, he nui atu te hāngai i ngā rā o te taumahatanga. Te kotahitanga, te whanaungatanga, te whakahirahira o te taiao, te whai ngātahi i te houkura, te whai wāhi noho, te aro atu ki ngā raru āhuarangi; i tuia ēnei kaupapa katoa i te tuhinga tuatahi, i whakamārōhia i te tuhinga tuarua, whai muri i te titinga o ngā taumata-huaketo ki ngā rā o tēnā, o tēnā.

Ka kitea ngā panonitanga i te mahere whakamutunga e whakaarotahi ana, e whakahihiko ana, e whakakiko ana i te mahere, ā, he mahere i hua mai i ngā wawata o tō tātou hapori. Nei rā te mihi ki te hunga i tāpiri i ngā kōrero, i tohu i ngā whārua o te mahere hei whakakikī atu.

Ahakoa kua huri te ao, he āhua rite tonu ngā wawata o te hapori. Ka titiro whakamua mātou ki tō tāua tui ngātahi i te āpōpō o Puketāpapa.



Julie Fairey

Heamana, Poari ā-rohe o Puketāpapa .

He whakarāpopotohangā o ngā kaupapa matua o te mahere

Whakaotinga 1: He hapori manaaki e hauora ana, e honohono ana, e taurikura ana

E hiahia ana mātou ki te whakamārō i ngā herenga tangata o te hapori, ā, ki te tautoko i tēnā, i tēnā ki te takahi i te ara tinana ora.

Whakaotinga 2: Ka whakapuaki kōrero ō tātou tāngata, me te whai wāhi ki te waihanga i tō tātou anamata

He wāhi tō tēnā, tō tēnā ki ngā whiringa me ngā kaupapa whānui o te pāpori. E tū whakamanawa ana ngā tāngata i runga i te mōhio i whai wāhi atu ō rātou kōrero ki te whakataunga whakamutunga

Whakaotinga 3: E tiakina ana, e whakapaitia ake ana anō hoki tō tātou taiao mō ngā reanga whakatupu o nāianei me āpōpō

Ka whakamanatia ngā hapori ki te whakarauora, ki te manaaki i te taiao, ā, ka tautokona ngā tāngata ki te noho waro-kore.

Whakaotinga 4: He takiwā pai te whakamahere me ngā takiwā tūmatanui ngangahau

He ātaahua, he mea tūhono ngā takiwā nā runga i ngā hoahoa i whakaritea kia marutau, kia ngāwari te tae atu ki ngā papa tākaro me ngā whare kaunihera, kia ngāwari ake te takahi i te ara tinana ora.

Whakaotinga 5: He kōwhiringa ikiiki e pono ana, e haratau ana, e iti iho ai te poke taiao

Muia katoatia ngā takiwā ki ngā tāngata e hīkoi ana, e eke paihikara ana. He maha ngā aratau hāereere, ā, he ngāwari te whakamahi, he marutau, he iti te parataia.

Whakaotinga 6: He ohaoha taurikura ā-takiwā me ngā whai wāhitanga mō te ako, te mahi me te mahi tūao

E angitū ana ngā pakihī, ngā ohu pāpori, ngā rōpū tūao, ā, he wāhi hei whai i te mātauranga, hei mahi hei tūao hoki. He kōwhiringa tō ngā kaimahi pūkenga nui ka tahi, e taea ana te mahi tata atu ki te kāinga ka rua.

Whakarāpopotohangā o ngā take pūtea

Ngā whiwhinga pūtea, whakapaunga pūtea, whakapaunga pūtea haumi o te Poari ā-Rohe o Puketāpapa mai i te 1 Hōngongoi 2020 ki te 30 Pipiri 2021.

Rārangi Tahua Pūtea ā-Tau	2020/21 (\$000)
Whiwhinga moni i ngā mahi whakahaere	
Ratonga haporī ā-rohe	389
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
Tataunga whiwhinga moni i ngā mahi whakahaere	389
Whakapaunga moni ki ngā mahi whakahaere	
Ratonga haporī ā-rohe	9,545
Whakarautaki ā-rohe me ngā mahi whakawhanake	41
Ratonga taiao ā-rohe	190
Mahi kāwana ā-rohe	1,021
Tataunga whakapaunga moni ki ngā mahi whakahaere	10,797
More whakapaunga moni ki ngā mahi whakahaere	10,408
Whakapaunga moni tōpū	
Ratonga haporī ā-rohe	2,407
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
Tataunga whakapaunga moni tōpū	2,407

Ngā Mema o te Poari ā-Rohe o Puketāpapa

	Ngā taipitopito hei toro atu ki ngā mema
	Julie Fairey –Heamana Waea: 0212879900 julie.fairey@aucklandcouncil.govt.nz
	Harry Doig – Heamana Tuarua Waea: 021627811 harry.doig@aucklandcouncil.govt.nz
	Ella Kumar, JP Waea: 0212852999 ella.kumar@aucklandcouncil.govt.nz
	Fiona Lai Waea: 0211981361 fiona.lai@aucklandcouncil.govt.nz
	Bobby Shen Waea: 0211185832 bobby.shen@aucklandcouncil.govt.nz

	Ngā taipitopito hei toro atu ki ngā mema
	Jon Turner Waea: 0211903734 jon.turner@aucklandcouncil.govt.nz

